

Skráning og leyfisbréf.

5. gr.

Neyðarsendibaujur verða skráðar með öðrum fjarskiptabúnaði í leyfisbréfi fyrir radió-tæki skipa.

Á leyfisbréfi skal tilgreina tegund og raðnúmer sérhverrar bauju.

Gjald vegna breytinga á leyfisbréfi er skv. gjaldskrá Fjarskiptaeftirlits ríkisins.

Ýmis ákvæði.

6. gr.

Ef neyðarsendibauja glatast, skal það þegar tilkynnt Fjarskiptaeftirliti ríkisins. Einnig skal tilkynna lögreglu, ef ástæða þykir til.

Ef notkun neyðarsendibauju er hætt eða hún er talin ónýtt, skal það þegar tilkynnt til Fjarskiptaeftirlits ríkisins. Eigandi er ábyrgur fyrir því að gerðar séu viðeigandi ráðstafanir til þess að útiloka sendingar.

Geymsla í landi er eingöngu heimil hjá sölu- og þjónustuaðilum, sem eru ábyrgir fyrir því að viðeigandi ráðstafanir séu gerðar til þess að útiloka sendingar.

Seljandi neyðarsendibauju skal upplýsa kaupanda um ákvæði reglugerðar þessarar.

7. gr.

Brot gegn reglugerð þessari varða viðurlögum samkvæmt lögum um fjarskipti nr. 73/1984 með síðari breytingum.

Gildistaka.

8. gr.

Reglugerð þessi, sem sett er samkvæmt lögum um fjarskipti nr. 73/1984 sbr. nr. 32/1993, staðfestist hér með til þess að öðlast þegar gildi og birtist til eftirbreytni öllum þeim, sem hlut eiga að máli.

Samgönguráðuneytið, 26. október 1993.

Halldór Blöndal.

*Ragnhildur Hjaltadóttir.***SAMÞYKKT****um búfjárhald í Bíldudalshreppi.**

1. gr.

Markmið sveitarstjórnar Bíldudalshrepps með samþykkt þessari er að tryggja sem best skipulag, stjórn og eftirlit með búfjárhaldi í Bíldudalshreppi, með ákvæðum um vörsluskyldu og ábyrgð allra búfjáreigenda.

2. gr.

Búfjárhald (alifugla, geita, hrossa, kanína, loðdýra, nautgripa, sauðfjár og svína) er óheimilt í Bíldudalshreppi nema með sérstöku leyfi sveitarstjórnar. Bændur sem á lögbýlum búa eru þó undanþegnir ákvæðum samþykktar þessarar um leyfisumsókn og leyfisveitingu.

3. gr.

Sveitarstjórn er heimilt að veita einstaklingi leyfi til að halda sauðfé með eftirfarandi skilyrðum:

- a) Umsókn um leyfi til sauðfjárhalds skal senda sveitarstjóra Bíldudalshrepps sem gefur út leyfi að fenginni samþykkt sveitarstjórnar. Leyfi skal gefið út á nafn og er ekki framseljanlegt. Leyfi er gefið út til eins árs í senn með gildistíma frá 1. september. Endurnýjun leyfis fer fram við álagningu leyfisgjalds, byggða á nýjustu skýrslu eftirlitsmanns sveitarstjórnarinnar, og innheimtu þess, sbr. 8. gr. Í vörslu sveitarstjórnar skal vera skrá yfir alla þá sem hafa leyfi til sauðfjárhalds.
- b) Leyfi er háð því að gripahús séu snyrtileg og vel við haldið.
- c) Hámarksfjöldi sauðfjár takmarkast við þann fjölda sem fram kemur í leyfi sveitarstjórnar.
- d) Vörsluskylda er allt árið og er sauðfjárhaldið að öllu leyti á ábyrgð eiganda fjárins.
- e) Leyfi er háð því að aðstaða til sauðfjárhalds og aðbúnaður sé fullnægjandi, þ.e. húsakostur, geymsla fóðurs og taðs, girðingar, fóðrun og önnur umhirða.

4. gr.

Sveitarstjórn er heimilt að veita einstaklingi leyfi til að halda hross í skipulögðum hesthúshverfum með eftirfarandi skilyrðum:

- a) Umsókn um leyfi til hrossahalds skal senda sveitarstjóra Bíldudalshrepps sem gefur út leyfi að fenginni samþykkt sveitarstjórnar. Leyfi skal gefið út á nafn og er ekki framseljanlegt. Leyfi er gefið út til eins árs í senn með gildistíma frá 1. september. Endurnýjun leyfis fer fram við álagningu leyfisgjalds, byggða á nýjustu skýrslu eftirlitsmanns sveitarstjórnar, og innheimtu þess, sbr. 8. gr. Í vörslu sveitarstjórnar skal vera skrá yfir alla þá sem hafa leyfi til hrossahalds.
- b) Hámarksfjöldi hrossa takmarkast við þann fjölda sem fram kemur í leyfi sveitarstjórnar og skal taka mið af stærð einstakra hesthúsa og skipulagi hesthúshverfis.
- c) Vörsluskylda er allt árið og er hrossahaldið að öllu leyti á ábyrgð eiganda hrossanna.
- d) Leyfi er háð því að aðstaða til hrossahalds og aðbúnaður sé fullnægjandi, þ.e. húsakostur, geymsla fóðurs og taðs, girðingar, fóðrun og önnur umhirða.

5. gr.

Sveitarstjórn er heimilt að veita einstaklingi leyfi til að halda annan búfénað en sauðfé og hross með eftirfarandi skilyrðum:

- a) Umsókn er greini tegund búfénaðar skal senda sveitarstjóra Bíldudalshrepps, sem gefur út leyfi að fenginni samþykkt sveitarstjórnar. Leyfi skal gefið út á nafn og er ekki framseljanlegt. Leyfið er gefið út til eins árs í senn með gildistíma frá 1. september. Endurnýjun leyfis fer fram við álagningu leyfisgjalds, byggða á nýjustu skýrslu eftirlitsmanns sveitarstjórnar, og innheimtu þess, sbr. 8. gr. Í vörslu sveitarstjóra skal vera skrá yfir alla þá sem hafa leyfi til búfjárhalds.
- b) Heimilt er að takmarka leyfi við ákveðinn fjölda búfjár.
- c) Vörsluskylda er allt árið og er búfjárhaldið að öllu leyti á ábyrgð eigenda.
- d) Leyfi er háð því að aðstaða til búfjárhalds og aðbúnaður sé fullnægjandi, þ.e. húsakostur, geymsla fóðurs og úrgangs, vörslur, fóðrun og önnur umhirða.

6. gr.

Lausaganga alls búfjár er óheimil á öllum tímum í eignarlandi Bíldudalshrepps.

7. gr.

Fylgi leyfishafi ekki settum reglum um aðbúnað og meðferð búfjárins má afturkalla leyfi til búfjárhalds að undangenginni aðvörun.

Hvern þann búfénað sem sleppur úr vörslu skal taka hvar sem til hans næst og færa í örugga vörslu, sem eftirlitsmaður sveitarstjórnar sér um. Eiganda skal tilkynnt um gripi sína og gert að sækja þá og greiða áfallinn kostnað, svo sem tjón og kostnað við handsömun. Hafi eigandi ekki hirt um að sækja gripi sína eða greiða áfallinn kostnað innan tíu daga, er heimilt að svipta viðkomandi leyfi til búfjárhalds í Bíldudalshreppi.

Við ítrekað brot á þessum reglum missir leyfishafi rétt til búfjárhalds og verður gripum jafnframt ráðstafað í samræmi við 11. gr. laga um búfjárhald nr. 46/1991.

8. gr.

Til að framfylgja samþykkt þessari skal Bíldudalshreppur skipa eftirlitsmann, einn eða fleiri, sem annast eftirlit með húsakosti, ásetningi búfjár, aðbúnaði, fóðrun, hirðingu og vörslu hreppslandsins. Auk forðagæslu og vörslu lands skal búfjárefirlitsmaður halda skrá um búfjáreigendur og fjölda búfjár af einstökum tegundum.

Heimilt er að innheimta leyfisgjald af búfé utan lögbýla til að standa undir kostnaði við forðagæslu og búfjárefirlit. Skiptist það í grunngjald og gjald fyrir fjölda búfjár hvers leyfisshafa. Landbúnaðarráðherra gefur út gjaldskrá fyrir leyfisgjöld.

9. gr.

Brot gegn samþykkt þessari varðar sektum eða fangelsi, ef miklar sakir eru. Með mál út af brotum skal fara að hætti opinberra mála.

10. gr.

Samþykkt þessi, sem samin er og samþykkt af sveitarstjórn Bíldudalshrepps, staðfestist hér með samkvæmt lögum um búfjárhald nr. 46 25. mars 1991, til þess að öðlast þegar gildi og birtist til eftirbreytni öllum þeim sem hlut eiga að máli.

Landbúnaðarráðuneytið, 25. október 1993.

Halldór Blöndal.

Jón Höskuldsson.

AUGLÝSING

um staðfestingu á aðalskipulagi Svínavatnshrepps 1992-2012.

Samkvæmt skipulagslögum nr. 19, 21. maí 1964 hefur ráðuneytið þann 2. nóvember 1993 staðfest uppdrátt og greinargerð aðalskipulags Svínavatnshrepps 1992-2012.

Frestað er skipulagi á veglínu frá Reykjabót að Svínvetningabraut. Einnig nær staðfestingin ekki til marka sveitarfélags í óbyggðum.

Uppdráttur þessi og greinargerð hafa hlotið þá meðferð sem skipulagslög nr. 19/1964 mæla fyrir um og samþykki sveitarstjórnar Svínavatnshrepps og Skipulagsstjórnar ríkisins.

Umhverfissráðuneytið, 3. nóvember 1993.

Össur Skarphéðinsson.

Hrafn Hallgrímsson.